



**Operation Sindoor mapang Pak nungger
tayimtsü 4 raksatsü: Amit Malviya**

**Trump-i tariff 50% meshitsü amokmeren,
EU-i akumtsübotsü ayongzüker**



Tetsürtem 'workforce' nung dendakjang PM Modi

New Delhi, May 24, 2025 (Agencies): Honibarnü New Delhi nung Prime Minister Narendra Modi menden ser NITI Aayog indang 10th Governing Council Meeting menogo.

Iba senden nung Prime Minister Modi-i workforce nung tetsürtem dendaktsütsü atema inyaksü nenshia jembi.

Asenoki asen work force nung tetsürtem dendaktsütsü atema inyaksüla. Tetsürtem workforce nung dendaktsütsü atema asenoki özüngtem, policy tem latettsüla ta PM Modi-i senden nung ashi.

NITI Aayog senden nung state aser Union Territory tem nungi Chief Minister aser Lieutenant Governor (LG) tem aden.

"Sensotem taküm nung temelenshi bener arutsüsa asenoki policy tem yanglutsüla.

Nübortemi temelenshi metet nung dang iba ajanga temelenshi tashi itdaktsür aser movement ka ama melenshidaktsür. Nisung Crore 140 taginübatem tongdaktsütsü atema asenok külemi inyaksü maongka tulu lir" ta PM Modi-i senden nung adenertem ayongzüker.

"Asenoki terenlok mapa tekaraba nung inyaksüla aser Centre o state tem külemi telok ka ama inyakra, alizüng ajak tongtettsü" ta paisa ashi.

"Asenok ajaki alizüng ka nung temulung agütsütsüla, 2047 tashi nung Bharat Viksit kümdaktsütsü atema. Asenoki state shia Viksit, yimti shia Viksit, Nagar Palika shia Viksit aser yimtsüng shia Viksit kümdaktsütsüla. Asenoki iba tangatetba nung inyakra, Viksit Bharat kümdaktsütsü atema 2047 tashi maotsü" ta PM Modi-isa ayongzüker.

Nagaland Health Protection Society-i metetdaksür

Dimapur, May 24, 2025 (TYO): Financial Year 2025-26 atema Nagaland nung aser tangalen public aser private hospitals-i schemes balala kübok healthcare services atema Nagaland Health Protection Society (NHPS)-i tenüngtem meshiogo.

Iba ya Ayushman Bharat Pradhan Mantri Jan Arogya Yojana (AB PM-JAY), aser Chief Minister's Health Insurance Scheme (CMHIS) atema lir.

Iba atema <https://cmhis.nagaland.gov.in/category/mou> nung Tripartite Memorandum of Understanding (MoU) indang temetettsü tejangja angutsü. Anungji

hospitals-i

Tejangrar hospital temi empanelledhospital@cmhis.nagaland.gov.in nung email ajanga Chief Executive Officer (CEO), Nagaland Health Protection Society (NHPS) dangi application den kulikakettem yoktsü akok.

Nagaland nung aliba hospitals AB PM-JAY and CMHIS (EP & General) atema aser Nagaland adena orr aliba Hospitals CMHIS (EP) atema empanelled asütsü.

Iba dak sendakba osang metetnürtem i empanelledhospital@cmhis.nagaland.gov.in mesüra 1800-202-3380 nung NHPS Toll-Free Helpline ajanga tongteptsü akok.

State Finance Commission-i Mangkolemba semdang

Dimapur, May 24, 2025 (TYO): Chairperson, Sarah R. Ritse lenisüba kübok 4th State Finance Commission-i May 21, 2025 nü Mangkolemba Town Council (MTC) semdangogo.

Sarah ya retired Commissioner & Secretary, GoN lir aser lai aniba teshimtet teloki nübortem ajurua olemteptsü aser asadangtsü atema Mangkolemba semdang.

Külem senden ka amendang Five-Year Plan jila atema Five-Year Plan indang lemsatöp. Idangji MTC-i jila indang temetettsü tatsüka lemsatöp aser nüngdakbatem den khuretem metetdaksü.

Market facilities, roads, aser drainage systems den nüngdakba

mapatongtem inyaka aotsü atema MTC ket nung senotsü peria mali ta parnoki ashi.

MTC-isa tarutsü nung terenlok maparen inyaka aotsü asoshi ali peria lir anungji State Finance Commission-i Mangkolemba jila tajungba akümtsü atema infrastructural aser civic initiatives asoshi senotsü agütsütsü mepishia metetdaksü.

Iba senden nung Executive Officer (MTC) & ADC-i anir Mangkolemba Town Council ketdangsürtem aser councilors aden.

Senden nungsa Ward Chairmen, Gaon Boras, aser Jangpetkong Senso Telongjem Mangkolemba (JSTM) General Secretary nungger aden.

5 Tribes Committee on Review of Reservation Policy-i lungkak aittsü

Dimapur, May 24, 2025 (TYO): State sorkari Nagaland nung backward tribes atema job reservation policy meyipa repringshitsü aser yanglushitsü akhangba atema telangzüba magütsüra özüangi melaba ama lungkak aittsü ta 5 Tribes Committee on Review of Reservation Policy-i metetdaksüogo.

Kin 5 luden nung Angami Public Organisation, Ao Senden, Lotha Hoho, Rengma Hoho aser Sumi Hoho nungi teshimtet nübortem dena lir. Parnoki September 20, 2024 nü state sorkar dang reservation policy meyipa repringshitsü atema memorandum ka agütsü saka telangzüba kecha magütsü.

Iba jagi April 26, 2025 nü parnoki sorkar nem mapang züngzüksü aser ibaji May 26, 2025 nü tembangtsü. Honibarnü Chümoukedima nung kin pungu nungi telok balala külem senden ka amendang özüangi melaba ama lungkak aittsü telemtetba agi.

Sorkari iba onük atema inyakdar ta Elections & Tribal

Affairs H Tovihoto Ayemi-i ashi saka külen Government spokesperson & Power Minister KG Kenye-ibo Census ka magi tashi policy review malitsü ta shiogo, anungji sorkar osangtem meputeter, ta ta committee secretary GK Zhimomi-i ashi.

Maneni, 2021 nungi Census magii arur aser kodang agitsü'ar memetet aser onoki joko matatsü ta paisa ashi.

"Committee-i akhangba onük tongtibaji reservation policy agientsü mesüra tanüngba unreserved quota ajak kin 5 nem lemozütsütsüba lir" ta GK Zhimomi-i nenshi.

Committee-i reservation nungi tajangzüker anguba kin shinga anema menokdaker aser iba policy ya küm 48 tashi memelenshi dang bentshia aruba atema meyipa repringshitsü nüngdaker ta pai metetdaksü.

Sorkari 1987 aser 1989 nung job reservation policy meyipa mereprangshitet aser tanga sangdong ka magütsü tashi reservation maneni aotsü ta

tetuyuba ka agütsüba tanü tashi bentshia arur, ta paisa ashi.

"Nagaland job reservation policy ya tangar memenepba kintem ajungkettsü atema mezüng yangluba liasü saka mapang süia arudang iba policy ajanga meputep adokdaksüogo. Reservations nungi tajangzüker anguba kintemi "advanced tribes" aika ajatetogo saka parnoki tang tashi tajangzüker angur. Tesüiba nung state sorkartemi policy meyipa repringshitsü atema tentetba luden aikati osangtem agütsüogo saka itemji mapa kuma meinyaki dang arur" ta 5 Tribes Committee on Review of Reservation Policy-i ashir.

"Kodanga memelenshiba aser meyipa mereprangshiba 'reservation system' ajanga Scheduled Tribes rongnung rongsenketzüng tsütsü meputep aser kin o kin tsüngda meputep adokdaksür. Nagaland job reservation policy meyipa mereprangra state ajungalen meputep aser mepetmesü adoktsü akok" ta parnokisa ashir.

Nagaland-i PMMSY Guidelines yanglushitsü mepishi



May 23, 2025 nü New Delhi nung Fisheries Secretaries Conference 2025 and National Workshop on Harnessing Technology and Innovation in Aquaculture nung Principal Secretary for Law & Justice, Fisheries & Aquatic Resources Y. Kikheto Sema aser Joint Director, Fisheries and Aquatic Resources Neitho-o Kuotsu na adenba angur.

Dimapur, May 24, 2025 (TYO): Principal Secretary for Law & Justice, Fisheries & Aquatic Resources, Y. Kikheto Sema, IAS-i Centre dang Pradhan Mantri Matsya Sampada Yojana (PMMSY) nung funding pattern melenshitsü mepishia metetdaksüogo.

May 23, 2025 nü New Delhi nung Fisheries Secretaries Conference 2025 and National Workshop on Harnessing Technology and Innovation in Aquaculture alidang Kikheto Sema-i iba temepishiba agüja liasü.

PMMSY inyakyim yanglushidang North Eastern Region aser Nagaland asoshi temelenshi kar asütsüla ta pai ashi.

Tang PMMSY kübok hectare shi Rs 8.40 lakh agütsüba yagi mepirir aser NPWD Schedule of Rates tesüsabuba nung hectare

shia Rs 25 lakh lateta lir ta Kikheto-isa ashi.

"North Eastern Region nung anentsüh aser tzümetsüng lendong ataloker anungji ponds aser water bodies tejentem yanglushitsü aser tushitsü atema latettsüla. Taoba nungbo iba onük ya liasü saka tang teinyakdak PMMSY framework nungbo mali" ta pai metetdaksü.

"Centre sorkari agricultural aser allied sectors atema integrated cluster approach tenzüksüla. Iba ajanga yimtsüngtem nung productivity, marketability, aser Agro-Aqua-Eco-Tourism ajungkettsü" ta paisa ashi.

"PMMSY kübok funding pattern ya tang 60:40 ratio (Central: State) lir aser iba ajanga Northeast nung ango metsürtemi parnok shilem magütsüteter. Anungji Northeast aser tenemlen aliba state tem nung tanga

schemes ama 90:10 mesüra 80:20 asü nung junger" ta Kikheto-i ashi.

Dimapur nung modern fish market ka lapoktsü mepishir aser iba nung hygienic aser state-of-the-art facilities alitsüla ta paisa Centre dang mepishiogo.

"Bank aser financial institution-i PMMSY kübok farmers, entrepreneurs, aser cooperatives yaritsü atema Centre-i tetuyuba agütsütsü mepishir kechiyong bank temi fishery dak sendakba maparen yaritsü nungnanger" ta Kikheto-isa Centre dang ashi.

Union Secretary for Fisheries, MoFAH&D, Dr. Abhilash Likhi, IAS-i tebilemba ajak asadangtsü aser PMMSY guidelines renemba nung dendaktsütsü ta nangzüker.

Iba sentong nung Y. Kikheto Sema den Fisheries and Aquatic Resources, Nagaland Joint Director Neitho-o Kuotsu aden.

Phezoucha Rhüba nung Digital House Numbering tenzük



Kohima, Monupii/May 24 (TYO): Kohima nung aliba Phezoucha Rhüba alizüng tasen ka tonga Hokulbarnü Digital House Numbering (DHN) tenzükogo.

Iba ya Additional Deputy Commissioner (ADC) Kohima, Ruopfükuotuo Noudi ajanga semzüksü, kong nüburtem aser lenirtem dena liasü. Phezoucha Rhüba ya New Secretariat, Assembly Secretariat aser Kohima tesem balala nungi 10 sq. km dak tali lir.

Sentong nung DHN Committee convenor Dr. Ketshukietuo Dzüvichü menden liasü aser pai iba inyakyim tajangzük rasaa ashi.

Digital house numbering nungya ki shia unique digital identifier ka-ka lir, koba tejangjaba metettsü asoshi physical plate nung sayua lir. "Iba system yagi mail aser parcel delivery aser emergency responses nung teyari tulu agütsütsü," ta pai ashi.

Committee-i Geographic Information System (GIS) survey technology indang system amshia iba mapa inyaker, koba colony asoshi mezüngbuba

lir, ta Dr. Dzüvichü-i telok nem metetdaksü.

"Iba maparen ya tesüiba küm 7-8 tashi shisadanga aser sentong yanglua aru, koba Phezoucha Rhüba tir aser par team den Co-convenor Petevilie Khatsü nungeri bendanga agütsür inyakba ajanga takok angu," ta pai ashi.

ADC Kohima Noudi-i iba sentong nung jembidang Kohima nung Phezoucha Rhüba ya kanga kera ainba colony tem rongnung ka lir ta ashi.

Pai iba sentong ya dangartem asoshi model ka ama asütsü ta ashi aser colony nung alir dang tanüla tajung aliba tenüng sanga liasü.

"Senotsü peria maliba ajanga municipal bodies timtem balala ajuruaka iba ama nüburtemi anir digital mapa inyakba ya tarutsü asoshi lenmang tajung lapoktsür alitsü," ta pai ashi.

Ki o jen, ali mesüra toll taxes ama local taxes maliba ajanga municipal rongsen kanga tataktet lir aser town councillors timba sanitation fees nung metaloka alir, ta Noudi-i ashi.

"Ajisüaka lenir ajungba, maparen tasen ratetba aser

nüburtemi amalitep akaba ajanga asenoki item metokmeperi ajanga aotsü aser danga colony temia Phezoucha Phüba sülen anidaksü imlar," ta pai ashi.

Lhisemia Council indang chairman Ayie Yhome-i iba sentong nung jembidang, iba project ajanga tarutsü nung ajangzüksüba indang lemsatapa liasü.

Yamai inyakba ajanga urban governance tajungba akumba kisüng masü saka public health and safety nunga yaritsü, ta pai ashi.

Lenmang balala nungi taitüsü liaka nüburtemi telungjem nung alitsü nüngdaker, ta Yhome-isa ashi.

Yhome-i nüburtem dang tangatetep nung alitsü ayongzük aser kati ka den yaritepa alitsü saka asen colony nung alir mesüra mapa inyaker illegal immigrants bhukuma menokdaksüla, ta ayongzük.

Petevilie Khatsu-i DHN indang rateta ashi, Pastor New Capital Baptist Church, Bendang ajanga sentong tenzük sarasadem aser Phezoucha Rhüba tir Kekhrielie Tseikha-i melepzüng o jembia liasü.

K.G. Kenye-i CEALPP senden ayonger

Dimapur, Monupii/May 24 (TYO): Minister, Parliamentary Affairs aser Committee to Examine the Applicability of Laws Passed by Parliament (CEALPP) indang mendenpuba K.G. Kenye-i iba committee Introductory Meeting ya May 27, 2025 anüngdang 11:00 ako Kenye-i sangdong ajanga ashi.

Padmashree T.Senka Ao-i züluba "Keyi Tanela" kaket sayaogo



Padmashree T.Senka Ao-i (abelen nungi anabuba)züluba "Keyi Tanela" ta asüba kaket ATA Tir Rev.Jongpong-i(abelen nungi asembuba) sarasadema meshitetja sayatsür kelen tangokba noksa.

Mokokchung, Monupii/May 24(TYO): Padmashree T.Senka Ao-i züluba "Keyi Tanela" ta asüba kaket Monupii 23 nü Mokokchung yimtak Ao Theological Association(ATA) 33 Buba Kümsem Inti Mungdang sentong metenzükdang ATA Tir Rev.Jongpong-i sarasadema meshitettsür sayatsüogo.

Kaket ka zülua adoktsüji mapa temela masü, saka nüburtem ajangzükdaksütsü tangatetba nung kaket tajung ka zülua nüburtem nem temoatsü agütsüba asoshi Ao Theological Association Tir Rev.Jongpong-i kaket zülur nem tenüngsang agüja ashi.

Assam Rifles-i NIEDO residential coaching program atema nübu shimogo



Dimapur, Monupii/May 24 (TYO): Assam Rifles ajanga NIEDO residential coaching programme batch 4 buba (2025-26) asoshi candidate shimba sentong Captain N Kengurüse, Maha Vir Chakra, Centre of Excellence and Wellness, Chieswema Garrison, Nagaland nung ahia liasü.

Shimtetba candidates nem ita 12 residential coaching angati agütsütsüaser ano Joint Entrance Examination (JEE) aser National Eligibility cum Entrance Test (NEET) amala national-level competitive examinations asoshi renemba nunga yaritsü.

Mokokchung nung DMCAE senden menogo

Dimapur, Monupii/May 24 (TYO): Additional Deputy Commissioner & Electoral Registration Officer, Mokokchung, Chumlamto Humtsoe lenisüba kübok Deputy Commissioner, Mokokchung indang Conference Room nung May

22, 2025 nü District Monitoring Committee on Accessibility Election (DMCAE) senden mena liasü.

Senden nung Assistant Election Officer, Renben Mozhui ajanga committee züngsemtem teinyaktsü lemsatapa liasü.

Senden amendang züngsem temi Election Commission of India ajanga guidelines agüja aliba den lirumedema electoral process nung mata-mabensar aser teintet rogotem asoshi facility tajungba agütsütsü indang jembia liasü.

AMRUT Mitra kübok süngdong-lidong atemtsü renemshir



Dimapur, Monupii/May 24 (TYO): Ministry of Housing and Urban Affairs ajanga AMRUT Mitra sentong kübok semzükba 'Women for Trees' campaign indng Phase-I nung shilem ka ama District Urban Development Agency, Mokokchung ajanga AYANU Self Help Group (SHG) den lungjemer May

21, 2025 nü Kathing Park, Mokokchung semdanga liasü.

Iba tesem semdangba nükjidong ya süngdong-lidong atemtsü asoshi tesem shimteta aliba ajung-majung asadangtsü asoshi liasü.

AYANU SHG yagi iba inyakyim asoshi tejangraba tulu sayua liasü. Iba mapang

züngsem temi sentong yanglua sensaksemba nung shilem agi aser süngdong atemba sülen süngdong tila parnoki anepalutsü nangzük.

Iba mapang SHG züngsem toku arua iba maparen nung shilem agia liasü. Phase-II plantation drive ya June 5, 2025 nungi August 3, 2025 tashi alitsü.

PM Modi-i State aser Centre na amalitepa inyaksü ayongzük



May 24, 2025 nü New Delhi nung Ato kilonser Narendra Modi mendenbuba ser NITI Aayog Governing Council senden amendang tangokba noksa nung angur.

New Delhi, Monupii/May 24 (Agencies): Honibarnü New Delhi nung NITI Aayog 10buba Governing Council senden nung Ato kilonser Narendra Modi-i Centre sorkar aser state sorkartemi 'Team India' ama longjemer amalitepa inyakra nükjidong ajak ataloktsü, ta ashi.

Terenlok mapatem kanga keraa inyaksü nüngdak, ta shia Ato kilonseri, "Asenoki terenlok mapatem kanga keraa inyaksüla. Centre aser States ajak longjemer Team India ama inyakra nükjidong kecha tamakoktsü masü," ta ashi.

Governing Council senden omenji 'Viksit Rajya for Viksit Bharat@2047' liasü.

Operation Sindoor sülenbo tang mezüng Ato kilonser Modi-i state balala nungi Chief Minister tem aser Union Territories nungi Lieutenant Governors den senden amener.

Ato kilonserisa state tem dang yimitem yangertsü aser raliwalirtemi semdangba tesem kabosa international standards nung anepalutsü ayongzük.

"India ya kanga kera 'urban' kümdar. Asenoki tarutsü atema yimitem renema alitsüla. State ajak nung terenlok alitsü, yimitem, jilatem aser yimtsüng ajak nung terenlok alitsüla. Asenoki item nungji rangloker inyakra 'Terenlok India' alizüng atongtsü atema atemzuka aliba küm- 2047 küm tashi matatsü,"

ta pai metetdaksü.

"State stemi raliwalirtemi semdangba tesem kabosa International standards nung anepalua facilities ajak agütsüsüla. Ibaji ajanga anasa aliba yimitema raliwalirtemi semdangba tesemtem kümdaksütettsü," ta pai ashi.

Terenlok linük ka akümtsü atema inyakba mapa ajak nung tetsürtem-a anioktsüla, ta pai ashi.

Niti Aayog nung züngsemtemji state ajak nungi chief minister tem, Union Territories nungi Lieutenant Governors aser Union Minister tem-a aika densema lir. Niti Aayog nung mendenbubaji Ato kilonser, Narendra Modi lir.

Operation Sindoor mapang Pak nunger tayimtsü 4 raksatsü: Amit Malviya

New Delhi, Monupii/May 24 (Agencies): Honibarnü BJP IT cell nung tongti, Amit Malviya-i, Operation Sindoor mapang nung Indian Air Force (IAF)-i Pakistan nunger tayimtsü pezü raksatsüogo; tayimtsü pezüji C-130 J medium lift aircraft ka, JF-17 ka aser F-16 fighters ana liasü, ta metetdaksü.

Pakistan Air Force (PAF) indang tayimtsü pezü raksatsüba osangji Malviya-i pa indang social media handle X ajanga metetdakja liasü.

Malviya-isa, Operation Sindoor mapang nung India nunger S-400 air defence system ajanga kilometer 315 pilar Pakistan nung aliba SAAB-2000 airborne early warning system ka raksatsü, ta metetdaksü.

"Operation Sindoor mapang nung Adamampur nung aliba India

nunger S-400 air defence system 11 ben amshia liasü," ta pai metetdaksü.

India aser Pakistan na tsüngda ceasefire telemtetba agiba sülen Ato kilonser Narendra Modi-i Adampur Air Base ya semdanga liasü.

Malviya-isa, May 10 ayaterm nung Indian Armed Forces-i air strikes ajanga Pakistan nunger air bases aser air defences pezüben amak, aser ibaji ajanga Pakistan-i US dang ceasefire atema tiyongtsü aita inyakang ta mepishitsüsa aküm, ta metetdaksü.

Malviya-isa, IAF-i Rafale tayimtsü nungi SCALP missiles aser SU-30 MKI raraba tayimtsü nungi Brahmos missiles amshia Nur Khan airbase nung aliba Northern Air Command-control network amak, ta metetdaksü.



Telungpur telok Jharkhand Jan Mukti Parishad (JJMP) nung lenir, Pappu Lohra noksa nung angur. May 24, 2025 nü Jharkhand kübok Latehar district nung sepaitemi pa khasetogo.

Nehru, Vajpayee, Modi nunger ajaki yimjung atema inyak: Kanimozhi

New Delhi/Moscow, May 24 (Agencies): Pakistan-i kiralongrartem pusemba aser India-i kiralongrar anema raratsü melungtetba osang alima dang sangdongtsü atema India nungi teshimtet telok teneti linük aika semdangar.

Honibarnü Russia nung Dravida Munnetra Kazhagam (DMK) nungi MP, Kanimozhi-i, India nung mezüngbuba Ato kilonser Pandit Jawaharlal Nehru nungi tenzuka taoba mapang Ato kilonser Atal Bihari Vajpayee aser tang teinyakdak Ato kilonser Narendra Modi nunger ajaki India aser Pakistan na tsüngda teti atema yimjung bener arutsü asoshi inyak, ta ashi.

Russia yimtiba, Moscow nung jembidang Kanimozhi-i, "Pandit Jawahar Lal Nehru nungi tenzuka Atal Bihari Vajpayee tashi aser Ato kilonser Narendra Modi tashi; parnok ajaki India aser Pakistan na tsüngda teti asoshi yimjung bener arutsü atema inyakogo. Teti agia onok samanir sür inyakogo, ajisüaka tia makai yimjung atema jembiba mapang nung kiralongrartemi India

tesem balala amaker, aser tesendaktepji bushidangra item ajakji Pakistan nung amenoker inyakba ta bushiteter. Ato kilonseri, kiralongra aser kiralongra pusemba naji balala masü saka kasa dang, ta jangja-jangja shiogo," ta metetdaksü.

India nunger Kanimozhi-i aniba telok nung züngsemtemji MP Rajeev Rai (SP), Capt. Brijesh Chowta (BJP), Prem Chand Gupta (RJD), Ashok Kumar Mittal (AAP) aser taoba mapang Ambassador Manjeev S Puri nunger lir. Parnoki Russia semdangba sülen Spain, Greece, Slovenia aser Latvia linüktem-a semdangtsü.

Parnok Russia tonga aodang Indian Ambassador to Russian Federation Vinay Kumar-i parnok agizuka liasü.

Honibarnep parnoki Moscow nung Indian Embassy anasa aliba Mahatma Gandhi kürakyanglu aliba tesemi oa Gandhi nem akhüm agütsü.

Kanimozhi-i X ajanga, lai aniba teloki Russia nung taoba mapang Ato kilonser aser RISS Director H.E. Mikhail Fradkov-a ajuruogo, ta metetdaksü.

Kerala nung tzüngluruwa mongpu kanga jelia tenzükogo: IMD

New Delhi, Monupii/May 24 (Agencies): India nung tzüngluruwa mongpu tama tenzükba state ji Kerala lir; ajioda south len aliba states-Kerala aser Tamil Nadu na nung tzüngluruwa mongpu tenzuka tzünglu sashia arudar, ta Honibarnü India Meteorological Department (IMD)-i metetdaksü.

Tzüngluruwa mongpu ya teti agia June 1 anogo nung tenzük, saka takümbo anogo 8 jelia tanü (May 24) Kerala nung tzüngluruwa mongpu tenzükogo, ta IMD-i metetdaksü.

Kerala nung tzünglu sashia aruogo aser yashi state yimtiba, Thiruvananthapuram nungbo süngdong aser electric light indong-a aika laoa liasü.

IMD-i Kasaragod aser Kannur districts nung Red Alert sangdong aser Kozhikode, Wayanad, Malappuram, Thrissur, Palakkad, Ernakulam, Idukki, Kottayam, Pathanamthitta aser Alapuzha district tem nung Orange alert sangdongogo. Iba dak alia weather department-i Kollam aser Thiruvananthapuram district na nung Yellow alert sangdong.

Tamil Nadu nunga Regional Meteorological Centre (RMC)-i state tesem balala nung tsüngsang-mopung kanga majungtsü, ta sangdongogo.

Tamil Nadu kübok Nilgiris aser Coimbatore nung Red alert sangdong aser Dindigul, Theni, aser Tenkasi nung Orange alert

sangdongogo. Item tesem nung tzünglu kanga sashia arutsü aser tsüngsang mopung majungtsü.

India Meteorological Department (IMD)-i item district nung aliba nüburtem dang kanga nüngdak madokra ainlen mesenzütsü aser tzümetsüng atema renema alitsü metetdaksü.

Ano külen IMD-i, taruba ghonda 24 tsüngda east-central Arabian Sea nung low-pressure area ka tentetogo aser ibaji yipru mopung tesashia akümtsüa akok, ta metetdaksü.

May 27 tashi nung Bay of Bengal nunga low-pressure area ka tentettsü aser tsüngsang-mopung kanga majungtsü, ta IMD-i metetdaksü.



May 24, 2025 nü Jaisalmer district, Rajasthan nung India-Pakistan arrtsülen Border Security Force (BSF) nungi tetsür sepaitemi arrtsü anükba noksa nung angur.



TIR YIMYIM YIMOBILEM (EDITORIAL)

DIMAPUR SUNDAY, MAY (MONUPII) 25, 2025

Tsüngrem yimli

Kotakji Tsüngrem yimli, anungji yangji Tsüngremi mulungba dang inyaker. Aji oda, Tsüngremi kechi ashir aser kechi inyaksü tenyadir kotak tenyartemi kecha nungnanga melii inyaker. Ibaji mesüka tanü asenok aliba lima nunga asenok kibong aser mapa inyakdak ajak nung Tsüngrem mulung südakjang ta Yisui ashir. Tsüngremji anüing aser ali madak kibur, Pai asenok yanglu ta asenoki amanger, saka asenoki Pai mulungba nung meliner. Aji oda, kiburi ashi mangaba kilirtemji asenok lir. Ibayongji, asenok mulungjang nung tepela malir kechiyong asenok taküm aser kibongji Tsüngrem yimli nung masü moiijing yimli nung alir. Iba amaji jashia malitsü asoshi Yisui asenok dang Mathi tapu 6 nung, " Nü yimli arung, Kotak nung kechi koma lir, yamaji alima nunga nü mulung sang," ta Tsüngrem dang mepishia sarasademdaksüner. Alemli Yisu Khrista alimai marudang Yihuda nungertemi Tsüngrem yimliji alima nung bendanger yimten yimsüsüba ajak makdoker, Yehovah Tsüngremi parnok nem yimten tashi agütsür, alima ajak ramoka Israel nungertemi yimsü asütsü ta bilema liasü. Ibayongji, kenü anogo Yisu nütsüngtemia Pa dang Israel nem kodang yimli meyipa agütsütsü ta asüngdangba Laishiba nung angur. Ajisüaka, Tsüngrem yimliji alima yimli amato masü, alima yimliibo rara asee meputep adokdaksür saka Tsüngremi yimli nungbo teti tepela aser tesünep lir. Ibayongji, anogo shia asenoki Tsüngrem dang kü mulungjangi, ozü kibongi, ozü telok dangi, ozü yimtaki mesüra onok alidaki "nü yimli arung," ta sarasademtsü Yisui sayu. Tetezü, kü taküm mesüra onok rongnung kotak nung ama nai mulungba dang inyakdakjang ta Tsüngrem dang mepishitsübaji tongtibanga ta asenok nem angatetdaksür. Tanüa asenok aikati Tsüngrem yimliji asenoki manguba tasür tanülatem alidak kotak limaji danga ta bilemer. Ajisüaka, Tsüngrem yimliji asenoki manguba kotak limaji dangbo masü saka tanü asenok alidak lima aser asenok kibongtem ya lir. Anungji, idaki Tsüngremi mulungba inyaka alitsü tim. Aji oda, kodang asenoki asen taküm, kibong aser lokti ya Tsüngrem yimlia ta angatetter, idangji asenoki Tsüngremi mulungbaji kechi ta angateta inyaksü merangtsü. Yimten nunga kodang yimsüsürtemi parnoka Tsüngrem yimli nung tenzüker ta angateta yimsü südir, pei mulungba agi masü saka Tsüngrem mulungba nung yimsü asütsü. Iba kasaji arogo nung tenzükertemia kodang arogoji Tsüngrem yimlia ta angateta tenzükdir, tali tejangraba aser tajungba tenzüktettsü. Iba kasaji nisung shiai pei inyakba mapaji Tsüngrem yimli nung inyaker ta kodang angateta tenzükdir, ochimashi inyaksüba shisatsüji anasaia marutsü. Aji oda, kodang asenoki Tsüngremi mulungba inyaknüa Pa dang asüngdangdir, Pai asenok dang lenmang sayutsü. Idangjibo asenok Tsüngrem den külemi Pa yimli nung Pai mulungba mapa inyaker tongti kaka akümtsü. Koba mapa südir süang, alima nung Tsüngremi mulungba mapa inyaka alitsübajisa jangratemtsü taketba asütsü. Aji oda, Tsüngremi mulungba inyaksübaji yimten nung asütsüa akok, lokti nung asütsüa akok, arogo nung asütsüa akok mesüra pei taküm aser kibong business nung asütsüa akok. Atangji, asen taküm nung Tsüngremi mulungba mapa angatettsü aser reprangtettsübaji tasak, ibayongji Yisui asenok dang sarasadema Tsüngrem dang asüngdangtsü ajungshir. Sarasademba ajanga Tsüngremi asenok nem Pai mulungba mapa inyaksü asoshi renemtsütsü. Aji oda, asen taküm nung Tsüngremi mulungba dang inyakdakjang ta anogo shia asenoki sarasademtsübaji kanga tongtibang lir. Asen aliba lima ya Tsüngrem yimli kuma alitsübaji asen taküm aser kibong nungi tenzüksüla. Idangji dang, ano asen aliba lima nung Tsüngrem yimli ulushia kümyonga aotsüba mapa nung Tsüngremi asenok amshitsü. Asenoki aiben Tsüngremi mulungba ama masü saka aseni mulungba nung inyaksü asoshi yimten aser lokti nung shilem agir, kechiyong alima nung arogo dak alaka yimten aser lokti tentetjibo Tsüngrem yimli masü amai bilemer. Ajisüaka, asenoki yimten aser lokti nungbo 'nü yimli taru, onoki mulungba dang inyakdi,' ta ashitsü makok. Iba amaji bilema inyakerkem aika laogo aser ano laotsü, anungji asenokibo asen yimten aser lokti nung dena Tsüngrem yimli jaokdi.

OLEMSABANG

~Kumzuk Ao

Kibuba Taküm ali nungji

Kü Tsüngremi kechi ashir

Aji Ni Jembitsü.

2 Putipuyang 18:13

“METIZÜKTETI ZÜLU”

Pa ochi Khenyongi Tiyazi Obendang mali.

1st Putipuyang 16:27

Temeshi Laishiba Nung.

Shiti.

Shiti.

Shiti zülu ta melika ma?

Ngur-a ma?

Tenyartem Mapa 28:26.

Tekong 26:- Iba kin dangi Oang aser Shiang.

Nenoki Tangashibo Angashitsü.

Saka Kodanga Mangatettsü.

Timoti

Timoti Dangi Paul Tanabuba Shiti.

Okila

Iba Shiti Nung Pauli Timoti Nem Kibok Sayu O Agütsüba Tiemba Angutsü, Yisu Khrista Osangtajung Sayutsüngiba.

Tamachi Aser Kecha Memetetba Tetoktepba Lendongtem Koba Agi Tajung Kecha Meinyaker Saka Itemji Angar Takum, Dangar Takum, Dangar taküm dangar Kibong Dang Raksatsür. Raksatsüba. Item Indang Tekümdangtsü Timoti Dangi Shiti Zülu.

Teyazü Tesayubatem Anema Tekümdangtsü.

Paul Taküm Nung Ajurubatem, Item Indang shia Shiti Zülu.

Tatem O.

2 Timoti Okila 1:1-2 / Tasen lai. Tapak 275

Isaia 45:5-6 / 45:12

Ni Kibuba Lir, Aser Ano Shinga Mali Kü Dak Alema Tangar Tsüngrem Mali

Oda anudoklen nungi aser anuolen Nungi Oda Kü Dak Alema Shinga Mali

Ni KIBUBA Lir, Aser Ano Tangar Shinga Mali.

Tekong 12 - Ni Alima Yanglu Aser Iba Manung Nisung yanglu. Ni Kü Teka Agi Anüngtem Songladaktsü, Aser Item telok Ajak Ni Tareni yutsü.

Tatem O

LUKE KAKET NUNGI

Shia Aruba Aser

Yisu Kotaki Atuba

Kechiba Nenoki Takümü Tasür

Rongnung Bushir? Pa Yangi Mali.

Saka Shia Aruogo

Luke 24: 5

ARUNG YISU KÜLEMTI

“Kibuba Atangji Shia Aruogo.

Aser Simon Madangi Adokogo”

Luke -24:34

Aser Kotak Tenyartemi Pa

Taküm Lir Ta Ashi.

Luke 21:23

Kü Teka Aser Tetsüing Ajiang.

Luke 24:39

Aser Pai Parnok Bethani Tashi

Anir Ao, Aser Pai Pei Teka Mekanga

Parnok Moatsü.

Pai Parnok Moatsüdang.

Pa Parnok nungi Pila.

Aser Kotki Anir Atu.

Luke 24: 50-51

YISUI ASENOK MOATSÜR

Kotaki Atuba Mapang Tashi Nung Pai

Asenok Moatsür Ang Pa

Kotaki Anir Atu.

Dang Mapang, Christar Arogo Putu

Asenok meimchir rangpen, “Ajak”

Pa Temoatsü ma “Upon” nung alir.

Rem lanu rongnung mejangdaksür, Taküm alir,

Masü no?

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Florida nung aliba tzüymküm nung nisung 1,958 jungnúa bapti



May 18, 2025 nü Church of Eleven22 Arogoi Jacksonville, Florida nung aliba Hanna Park Beach nung baptitsüidang tangokba noksa nung angur.

May 24, 2025: Tan hopta tetenzüklen Florida nung aliba tzüymküm ka nung nisung 2000 jungnüai Yisu Khrista agizüka baptiogo.

Amongnü (May 18) Church of Eleven22 Arogoi Jacksonville, Florida nung aliba Hanna Park Beach nung nisung 1,958 baptitsüogo.

Church of Eleven22-i noksa aika lemsatepba den külemi, "Ozü Arogo nung nisung 1,958-i yimjak nung Yisu Khrista agizüka baptiogo! Küm shia tzüymküm nung baptiba sentong tajungba-tajungba dang ayongzüka agiteter. Tsüngremi ajungba atema onok süngmanger," ta metetdaksü.

Iba dak alia nisung meyrjang aika tzüymküm nung nokdaker baptirtem atema sarasademja liasü.

Osangbener den jembidang Arogo nung lenirtemi, baptiba sentong nung adentsü atema Florida aser southeast Georgia

temeket nung alirtem densema linük tesem balala nungi aika arua liasü, ta metetdaksü.

"Nüburtem nem Yisu Khrista meteta kümdaktsüsü aser Pa den tesendaktep yanglutsüsü atema onoki inyaker. Tanü nisung 1,958-i Yisu Khristaji Kibur aser Kümtetdakba ta sangdongogo. Iba dangji tajungba kecha mali. Arogo taküm lir aser Tsüngrem Tanelai mapa inyakdar. Yisu Khrista osangtajung ajanga maneni taküm aika melenshitsür," ta Arogo nung tongti pastor, Joby Martin-i metetdaksü.

Tesüiba küm 10 jungnüa Arogoi küm shia tzüymküm nung baptiba sentong ayongzüka agia arudar, aser küm shia iba sentong tuluba dang ayongzüka akar.

Yaküm-a kasa tesem nung Arogoi nisung 1,600 dak tema baptija liasü.

Church of Eleven22 Arogo nung otongdar, Jay Owen-i, "Iba

ya ajanga Arogo tasü masü aser Tsüngrem lir ta nenshia metetdaksür. Alima tesem ajaklen Pai nüburtem rongnung mapa inyaker, aser Pa tesüngmangtsü mapa ajanga onok süngmanger. Iba nung ya shilem agitetba ya sempet ka lir," ta metetdaksü.

Baptiba sentong nung adenertem aikati Facebook ajanga tebilemba balala lemsatepa liasü. Kati, "Iba sentong nung densema ajak den benjungtetba ya ni asoshi maongka liasü," ta ashi.

Ano kati Instagram ajanga, "Sayatenya tila million ka liasü. Iba anogo ya tesüngmangtsü anogo ka liasü," ta ashi.

Nisung ka tenüng agi, Jeanette Marsh-i, "Beach Baptism nung taküm agi ni küm pezübuba adener aser küm shia iba sentong tajungba-tajungba aser tesüngmangtsüka agiteter. Tsüngrem tenüng asanger," ta metetdaksü.

ANOGO ABEN TSÜNGREM DEN

TAMANG RONG AKANGA YUANG

Kü chir Timoti, nai tamang aser mulungsentsü tajung yua, tongbang tajung raratsü asoshi, akhidang ne indang shin otem amato ni ne nem iba ozüng nungloka yutsür. 1 Timoti 1:18

Tamanger tajung ka asoshi tamang tongbang tajung raratsü kechi nüngdaker ta süra chichiba tamang Tsüngrem dak akang akanga yutetba ya lir. Alima tsütsübo takoksa ulura liaka, alima sangrasangji aser tatsüba jenti liaka, Tsüngrem tenüng amer Tsüngremi mumulungba tesayuba aser mapa inyakertem jenti adokaka, item tepuatsü ajak toktsür Khrista den asen taküm, kibong merüka meshia jajatetra tamang tongbang tajung rarar ka kuliji aji asütsü. Kasaji, tenyar Pauli Timoti dang tenzüker tajung ka ama Tsüngremer tongbang nung noktak dang tamang rong meraksai aser mulungsentsü shitak yur Tsüngrem tenzüksü ajungshia züluba lai o nung angur. Kechiyong shirnoki tamang aser mulungsentsü tajung nungi pila odir parnok tamang rong raksadoker.

Temeimbatem, Tsüngrem chir ka ama na aser nia Tsüngremer tongpang tajung raratsü asoshi tanu lai o ajanga ajungshir. Anata, tamang rong akanga yanglua lir ma? Tsüngrem dak chichiba tamang kaketba amangbapur küma lítettsü asen tamang sarasadem südi. Amen

Israel-i Gaza maneni amakba World Council of Churches-i aitsür

May 24, 2025: World Council of Churches (WCC) Executive Committee-i Israel-i Gaza maneni amakba sashia aitsüogo.

WCC-i, tang Israel nung aliba sorkari alia oa inyakba ya onoki aitsür aser item mapatongtem ya Israel nungertem-a aikati magizükteter, ta metetdaksü.

2023 küm October 7 nü Hamas teloki Israel amakba sülen Israel-i Gaza anema apuso. Iba rara nung tang tashi nung kiojen jenti raksatsüba den külemi nisung jenti taküm samaogo, ta WCC-i metetdaksü.

WCC Executive Committee-isa Gaza nung civilian tem amakba, hospitals aser nüngdakba kiojentem raksatsüba aser taküm March 2 nungi tenzüka teyari lenmang nokdangba ya International ozüng alema inyakba lir, ta metetdaksü.

"Item mapatem ajanga ken o bentettsü aser pua aliba Israel nunger chioktsü atema inyaksangshiba maparen nung tetsükdaktsü agütsür," ta WWC-i metetdaksü.

WCC-isa, "Item ama inyakba ya rara mapang ozüng alema inyakba lir aser meimchirtem anema inyakba lir," ta metetdaksü.

"Gaza tanaben atsünga agitsü aser Palestine nunger meindoktsü atema jakdaka

sangdongba ya tim masü. Iba ya kin ka meshimeshia samatsüsü atema inyakba den kasa lir, anungji International ozüng tenangzüka agia aliba linüktem ajaki iba ya aitsütsüla," ta WCC-i metetdaksü.

World Council of Churches-isa, Israel nunger inyaksangshi anema ola madokba ajanga linüktemi Israel pusemba sayur, ta metetdaksü.

WCC-isa sorkartem dang International Court of Justice obendangtem akhümtsübuttsü aser International Criminal Court-i ochi atema inyakba pusemtsü ayongzük.

WCC-isa tangsa telatetba kecha makai Gaza nung timtemba nüburtem nem teyari agütsütsü atema tenokdangba agienang ta takhangba agütsüba den külemi teraksatsüba anentsü atema amalitepa inyaktsü ayongzük.

"Meimchir dak mapetba mapatem yamai inyakba mapang nung alima nung Arogotemi ola madoki malitsüla," ta WCC-isa metetdaksü.

May 14, 2025 anogo tashi nung Israel-Gaza rara nung nisung 55,000 dak tali süogo; Palestine nunger 53,528 aser Israel nunger 1,706 süogo. Iba dak alia journalists 166 aser aid workers 224 süogo. Palestine nunger asürtemji shilem 80 shibo civilians lir.

Bible Institute-i yaria South Korea nung Holocaust Museum lapok



South Korea nung Holocaust Museum lapokba sentong nung tangokba noksa nung angur.

May 24, 2025: Korea Israel Bible Institute (KIBI)-i yaria South Korea nung tang mezüng Holocaust Museum ka lapokogo; Museum ji North Korea aser South Korea na arrtsülen Palu nung lapok, ta International Christian Concern (ICC)-i metetdaksü.

Korea Israel Bible Institute züngsemtemi, Holocaust museum lapokba ajanga nüburtemi shisatsü aser

tangazüktsü aika angutsü imlar; iba museum semdangertemi akhi puti otsü jangjaba ajanga tanü putu nung tesempa aser rara nokdangtsü atema shisadangtsü, ta ashi.

East Asia aser Southeast Asia nungbo Holocaust museums aikabo mali.

International Christian Concern (ICC) staff kati, "Alima tesem ajaklen Yihuda nunger sempaba kanga bulua

akümba mapang ka nung KIBI aser South Korea nungertemi Holocaust otsü lemsateptsü aser bilemtettsü atema mapa tajung ka inyakogo," ta ashi.

"Kidanger linük- North Korea, East Asia aser Southeast Asia nung aliba linüktem nung Khristantem aika maneni reshikangshiba mapang nung tang South Korea nung mezügbuba Holocaust museum lapokba ajanga item regions nung reshikangshiba tensa aser tamangba yimsü temeden anema inyakba sangdongtsü ICC-i imlar," ta ICC-isa metetdaksü.

World War II mapang Europe nung Yihuda nunger jenti tepsetba dang 'Holocaust' ajar. 1941 küm nungi 1945 küm tashi nung Nazi Germany aser parnok pusemertemi Germany aser Europe nung Germany-i atsünga aliba tesemtem nung Yihuda nunger million 6 dak tali tepseta liasü. Iba mapang nungji Europe nung Yihuda nunger shilem asemi nungi shilem anasü tepset.

AO OSHI ANGAZÜKDAK:**TANÜ ANGAZÜKTSÜBA OJANG****Tendang**

(v) ajung majung bendang, atidang, apidang (examine, test)

* Mapa bushirtem ajak tanishirtemi tendang.

Tendangdak

(n) temang nung tashidak reprangba tesem (laboratory)

* Mozü kidang temang tendangdak azü tendangdaksü.



Tir Yimyim

OLONG PAITEP # 7161

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S ____ i
9. Nisung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

- (5)

- (5)

- (5)

- (3)

- (3)

- (4)

- (4)

- (3)

- (3)

- (5)

- (5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Majinü
13. Tzüma nung senzüba

- (9)

- (5)

- (7)

- (5)

- (9)

- (7)

- (5)

- (5)

OLONG PAITEP # 7160 TELANGZÜBA**TIPIEN :**

1. Kasa, 6. Rangben, 7. Mait,
9. Poktet, 11. Ati, 13. Atasa,
16. Rür, 17. Rajang, 20. Lanu,
24. Nüngjem, 25. Süra.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Tajü,
21. Ano, 22. Onü, 23. Kua.

NAI-A YA METETTER MA

Iran nunger Abolfazl Saber Mokhtari-i tan agi tasembenbuba Guinness World Record ka ajatetogo.

Arishi küm 54 tain Mokhtari-i 2021 nung "most spoons balanced on the body at 85" otsü yangluteta liasü saka 2023 nung iba otsüji pasia 88 spoons agi ajateta liasü.

Taküm Mokhtar-i ano iba otsü ajatetogo aser iba atema pa temang nung 96 spoons yuteta liasü.

Assam sorkari Pahalgam nung asür kibongtem teyari agütsür

Guwahati, May 24, 2025

(Agencies): Assam sorkari May 23, 2025 nü Pahalgam kiralongrar mapa nung asür kibong ana nem teyari agütsüogo.

April 22 nü kiralongrartemi amakdang tepsetba nisung 26 kibong shia nem Rs 5 lakh teyari agütsütsü ta Assam state cabinet-i metetdakja liasü.

"Cabinet minister temi Kerala nung N Ramachandran aser Vishakapatnam nung J S

Chandramouli'er kibongtem semdang aser parnok nem senotsü teyari agütsüogo" ta Chief Minister Himanta Biswa Sarma-i ashi.

"Pahalgam nung nisungtem tepsetba sülen ita ka süiogo saka iba lendong nung tasür ajak asenon mulungjang aser sarasadem nung teti bilemtettsü" ta CM Sarma-i ashi.

"Cabinet Minister Kaushik Rai-i Kerala nung asür N Ramachandran'er kibong den

ajurute ta paisa metetdaksü.

"Ernakulam, Kerala nungi asür N Ramachandran kinungtsü Sheela Ramachandran ket nung senotsü teyari aser mangyimba shidi agütsüogo" ta Rai-ia ashi.

"Sheela Ramachandran den lar jala Arathi Ramachandran aser jabaso Aravind Ramachandran nungeri phone ajanga Dr. Himanta Biswa Sarma dang pelaba shiogo" ta Minister Rai-isa metetdaksü.

Golaghat nung Royal Bengal Tiger tepsetba atema nisung 3 apu

Guwahati, May 24, 2025

(Agencies): Golaghat district kübok Dusutimukh village nung Royal Bengal Tiger ka tepsetba atema Assam police-i nisung 3 puogo.

Par asem ya Trinay Mili, Panika Mili, aser Dhurba Mili nunger ta jangjaogo aser Dergaon Police Station nung parnok dang asüngdangya südar.

"Tinighariya Dukhutimukh nung nisung 1,000 shi ka adenshir Royal Bengal tiger tebong ka tepset" ta police-i ashi.

Iba keyi ya ita ka shi yimsüng temeket nung senzüa arua aser iba ajanga yimdaklirtem aoksadaksü. Iba keyi yagi Gopinath Mili ta ser yimdaklir ka tepset aser kiset shirurtem amak ta yimdaklirtemi ashi.

Brihostibarnü nisung telok ka nok, nü aser yintem bener adenshi aser parnoki tsüklü ka nung keyi jenoka aliba meketbang.

Yimdaklirtem jagi keyiji arem kati aniok aser idakji tepset. Nisung kari keyi temang lepsaa

bener senshi aser iba sülen jiang police tesem tonga ao.

Forest aser police ketdangsürtemi meyi mangji angu aser Golaghat Forest Range Officer office nung post-mortem asütsü atema bener ao.

"Hadir techira kar amshia keyi tepset. Nisung noklang tema iba nung densema alitsü ama temulung malemer. Police-i ken o ka benokogo aser bushisüngdang südar" ta Golaghat DFO Gunadip Das-i ashi.

Arunachal Minister-i Centre dang CUET exam centres talila meshir

May 24, 2025 (Agencies):

Arunachal Pradesh Education Minister Pasang Dorjee Sona-i Union Education Minister Dharmendra Pradhan dang state nung CUET (Common University Entrance Test) centres teimba akümtsü mepishia shidi ka zülüogo.

Arunachal Pradesh nung tang NIT Jote, NERIST Nirjuli, RGU Doimukh, aser iON Digital Zone Naharlagun nung dang CUET exams agir aser item ya state yimtiba Itanagar temeket nung

dang lir.

Iba ajanga kaketshirtemi timtem ajurur aser meta talang pilar aliba aser tenemlen aliba district tem nungi kaketshirtemi senotsü aika endoker ta Sona-i ashi.

Kaketshirtem yaritsü atema Pasighat (East Siang), Bomdila (West Kameng), Tezu (Lohit), aser Aalo (West Siang) nung CUET (Common University Entrance Test) centres lapok nung ajungtsü ta paisa Union Education Minister Dharmendra Pradhan dang ashi.

Tang tatidang agütsütsü atema kaketshirtemi kilometer aika jajatsüsa akümer aser karbo state adena orr ang agütsütsüsa akümer. Item khuretem ajanga kaketshir aikati maongka magishii süitemogo ta paisa ashi.

Arunachal Pradesh sorkari student-first education policy atema bendanga agüja inyaker anungji Centre sorkari infrastructure maliba ajanga kaketshirtem mezüngdoksü merangtsüla ta Minister Sona-isa metetdaksü.



May 22, 2025 nü Mizoram nung CID Crime kübok Special Narcotics Police Station ajanga gari ana nung Rs 50,00,000 alang heroin bena aliba apuba sülen agiba noksa angur. Police-i Joseph Vanlalhlana aser Lalramthara nati aniba gari ana nung heroin seret 1.142 shi (100 soap cases) bena aliba angu. Iba tatalokba atema bushisüngdanga aodang Bittu Chhetry, Naruj Jaman Laskar, Lalpekmuan aser Rodiniani nunger apu.

Russia-i Kyiv nung drone aser missile khaloktsü, nisung 15 yiru



Ukraine yimtiba Kyiv nung Russia nungeri amakdang raksatsüba apartment building ka nung nüburtemi reprangba noksa ka yangi angur.

Kyiv, Monupii/May 24 (Agencies): Ukraine yimtiba nung yasüung nungi Honibarnep tashi Russian drone aser missile agi maka nisung 15 yiru, ta Ukraine ketdangsür temi ashir.

Kyiv tesem ajungalen apokba aser machine gun akhaba ola angashi aser nisung aika subway stations nung jenok.

Russia aser Ukraine tsüngta sepai aser civilian noklang aika melentep tenzükbä sülen yimti ya amakba alitsü. Linük ana tsüngta tepuokdak alirtem melenteptsü asoshi taoba hopta Istanbul senden nung lemteta liasü.

Iba ama tezüngzüktep ya tang mezüngbuba yanglua liasü, kechiaser küm asem rara aruba nung ceasefire alitsü aiben meranga inyakba nung tamakok sa ajuru.

Hokulbar aonung nungi Honibar anepdang tashi Russia-i Ukraine amakba nung ballistic missiles 14, Shahed drones 250 amshia liasü. Ukraine sepaitemi missiles trok khazüka yok aser drones 245 neutralized sütsü - drones 128 khazüka yok aser electronic warfare amshia 117 aridok, ta ketdangsür temi ashir.

Kyiv City Military Administration ajanga ashiba agi, linük yimtiba nung missile aser drone sashia meyokteper amakba tesashitiba liasü.

"Onok ajak asoshi am mang kanga majung liasü," ta administration ajanga sangdong ka nung ashir.

Khazüka yokba missiles aser drones teraksa ya Kyiv indang city districts trok nung tsük. Nisung trok mozü kidangi

oa temang anepalutsüsa akum aser Kyiv kübok Solomianskyi district nung tesem ana nung mi adok, ta Kyib indang military administration acting head Tymur Tkachenko-i ashir.

Obolon district nung residential building ka kanga sashia raksatsü aser yangji tesashiba kongshia liasü. Yangji yiruba nisung pongu liasü, ta administration ajanga ashir.

Yangji alir Yuri Bondarchuk-i ashiba agi akhi ama air raid siren tenzükbä aser iba sülen teti ama drones tem meketa yimzü tenzükbä.

Mapang tatsüka lir pai ola adoka apokba angashi aser anünglen nungi aina jaksar aluba angu.

Kyiv nung air raid alert ya ghonda tenet dak tema liasü, aser iba ya ajanga missiles aser drones tem arur ta tekum dangtsü ashiba lir.

Kyiv mayor Vitalii Klitschko-ia nüburtem dang Russian strike drones 20 dak tema yimti leni arudar ta jelia metetdakja liasü. Amak tenzüker drones teraksa ya Obolon district nung shopping mall aser nisung aliba ki nung tsük, aser emergency services oa liasü, ta Klitschko-i ashir.

Tepuokdak alirtem Hokulbarnü melentepba ya linük anaprung nungi tepuokdak alir 1,000 melenteptsü tezüngzüktep tebenja ka yangluba nung phase mezüngbuba liasü.

Ukraine Tir Volodymyr Zenskyy-i ashiba agi, mezüng phase nung Ukraine nung 390 shi kidangi anir shilangogo aser hopta tatemlen ano chio ktsü imlar, koba rara nung pua alir melentepba tulutiba alitsü.

Russia indang Defence Ministry-ia Ukraine nungi kasaji agizükogo ta ashir.

Nisungtem ya Ukraine north tsütsü Belarus den arütsü nung melentep ta ashir.

Russia nungertem chiokba ya temang anepalutsü atema Belarus-i bener ao, ta Russian Defence Ministry ajanga ashir.

Rara tenzüker Ukraine nung civilian tem densema tepuokdak alirtem melentepba sentong tulutiba agiaka rara bo manener.

Front lone kilometre 1,000 shi nung tongpang maneni raratar, kong sepai me yirijang aika takum samaogo aser linük katia amakba manener.

May 16 nü Istanbul nung senden amenba sülen Turkish Foreign Minister Hakan Fidan-i tepuokdak alirtem melentepba ya temulung lemteptsü asoshi mera ka lir aser telok anaprungi ano ajuruteptsü tepang agibo agizükogo, ta shia liasü.

Ajisüka Kremlin odongtar Dmitry Peskov-ibo taruba senden kong amentsüar ano melem tet ta ashir.

Tang tepuokdak alirtem melentepba maparen tembangba sülen "sustainable, long-term, comprehensive peace agreement" ka atema ozü taginüba draft document Ukraine nem agütsütsü, ta Russian Foreign Minister Sergey Lavrov-i ashir.

European lenirtemibo Russia Tir Vladimir Putin-i yimjung asoshi inyakba nung temulung ajak magütsür aser par sepai tali tongpangi yoka Ukraine nung ali tali agitsü meranger ta aitsü.

Rara tembangtsü asoshi taginüba kar nung linük ana talanglang agi pilar aliba Istanbul senden nung angatet. Ukraine asoshi yamala taginüba kaji Western linük temi yaria mezüngbuba nung khen asoshi ceasefire aginer.

Russia indang Defence Ministry ajanga ashiba agi, May 20 aser 23 tsüngta tongpang nungi pilar Ukrainian drones 788 khazüka yokogo.

Ukraine indang air force ajanga ashiba agi, Russia-i Brehostibar aonung Shahed aser decoy drones 175 khaloktsü aser ballistic missile ka khaloktsü.

Trump-i tariff 50% meshitsü amokmeren, EU-i akumtsübotsü ayongzüker

Brussels, Monupii/May 24

(Agencies): European Union indang trade chief-i ashiba agi, züngsem 27 aliba bloc ya US den "amokmeren" masü "akumtsübo" nung ajemdaker trade deal ka yanglutsü tangatetba nung inyaktar ta ashir.

EU nungi US-i yokba oset ajak nung tariff shilem 50 meshitsü US Tir Donald Trump-i amokmerenba sülen EU leniri iba o ya ashir.

"Ajak atema ajungtsü asoshi deal ka yanglutsü atema EU-i bendanga agütsür inyaktar," ta EU Trade Commissioner Maros Sefcovic-i US Trade Representative Jamieson Greer aser Commerce Secretary Howard Lutnick den phone ajanga jembiba sülen ashir.

"EU-US trade ya asadangtsü makok aser amokmeren agi masü kati ka akumtsüboa len anitsüla. Asen tejangraba kumzüka ayutsü asoshi renema lir."

Hokulbarnü Trump-i EU-US trade ken o jembishinüba nung matatetba lemsat ep aser June 1 nü nungi tariffs timba akumtsü sentong lir ta shia liasü.


"Asenok [EU den] sensaksemba kecha lenia maor. US nung yangluba oset nung tariffs malitsü," ta Trump-i social media nung zülua liasü.

"Ni tezüngzüktep ka bushir masü - asenoki tezüngzüktep renema lir," ta pai mapang tatsüka lir osangbener dang ashir aser European company kati US nung investment tulu alinungbo menyonga kecha masü ta ashir.

Washington indang trading partners tulutiba rongnung EU ya ka lir, shiri taoba küm sen \$600bn (€528bn; £443bn) jenjang osettsüset yoka liasü ta US sorkari ashir.

Trump-i amokmerenba nung langzüdang, tariffs tali meshiba ajanga anatsülen teraksa ajurutsü akok, ta European sorkari ashir.

"Asenoki iba len mang nung jajatsü menü ngdaker.



Donald Trump

Jembishinü akatsü ya tajungtiba lir," ta Ireland indang Ato Kilonser Micheal Martin-i ashir.

France indang Trade Minister Laurent Saint-Martin-ia, "Onoki kasa yimya amshir: de-escalation, saka langzütsü renema lir," ta ashir.

German Economy Minister Katherina Reiche-ia US den tangatettep kati arutsü asoshi bloc-i mapa ajak inyaktsüla ta ashir.

April ita tetenzüklen Trump-i linük aika dang tariffs temloker meshitsü sangdongba mapang US nung ayokba EU osettem timba nung tax shilem 20 meshitsü densema ashir.

Iba sülen US tiri mapang talangka melie ita asem atema (July 8 tashi) tariffs tali meshiba anentsü, saka US indang trade partners dang baseline tax shilem 10 nung yutsü.

US tariffs ya China nungi aruba oset nunga meshir, saka mezüng dang nungi kanga agi tajemba agir.

US-i EU indang steel aser aluminium imports nung tariff shilem 25 meshir.

EU-ia amokmeren aser US anema mera agitsü sangdonger anen. Parnoki Europe dangi bener aruba sen €18bn (\$20bn; £15bn) alang US oset nung tariff shilem 25 meshitsü ta sangdong saka soita lir.

Europe aser US shishilempaba kanga meputep, kechiaser EU-i US nungi aliba dang timba ayoker ta Trump-i ashir.

Myanmar anasa tzü yim nung Rohingya nung 400 shi araksetogo: UN

Monupii/May 24, 2025 (Agencies): May 9 aser 10 nü tzü yim nung rong ana makepokba lendong nung Rohingya nung 427 shi süogo, ta United Nation-i ashir, koba Myanmar nung Muslim nung kin tilaba lir.

UN High Commissioner for Refugees (UNHCR) ajanga Hokulbarnü sangdong ka nung ashiba agi, iba lendong ya tejangja asünungbo taküm küm tenzüker tang tashinung tzü yim nung Rohingya refugee adenba lendong tulutiba alitsü.

"Ita tetenzüklen Myanmar anasa tsükum nung rong ana lendong ajuruba osang angashia UN refugee agency kanga

shisabulur," ta UNHCR ajanga sangdong ka nung ashir aser iba rong ana tzü yim nung makepokba tensa tejangja metettsü asoshi inyaktar ta shisem.

Tang tashinung osang nguteta aliba agi May 9 nü nisung 267 bena aliba rong ka tzü yim telungi lua nisung 66 dang kumzükbä aser tanabuba rong nungya Rohingya nung nisung 247 mener May 10 nü makepok aser nisung 21 dang kumzükbä.

Rong nung mena aliba Rohingya nung ya Bangladesh nung Cox's Bazar refugee camps yutsür aorba mesüra Myanmar anüolen Rakhine state nungi jena aorba alitsü, ta

sangdong ajanga ashir.

Rohingya nung küm aika Myanmar nung reshikangshia lir tang parnoki iba linük nungi jena aotsü asoshi takum bendanga agütsür aser aiben rong tila nung mener ayamesor.

Lendong ana osang yagi Rohingya nung tensa aser Bangladesh nung refugee temi timtemba bilemtetdaksür, ta UNHCR High Commissioner Filippo Grandi-i X nung post ka ajanga ashir.

2017 küm Myanmar mitkar temi pua merenshiba sülen Rohingya nung million ka dak tema Myanmar indang Rakhine State yutsür kidanger Bangladesh linük nung jenok.

Iba mapang jena aor rongnung parnok 180,000 shi Myanmar-i meyipa yoktsüba lir aser tanüngba Rakhine nung alirtem ya refugee camps balala nung kanga timtema alir.

2021 küm mitkar temi Myanmar nung Aung San Suu Kyi-i aniba election ajanga shimba sorkar atsü ngdok. Iba sülen Rakhine nungya mitkar aser Arakan Army tsüngta kanga sashia rarar.

"Tensa kanga majungba den teyari ajemba ajanga Rohingya nung takum nung kanga sashia kongshir aser parnok takum kumzüka jenjang tajungba nung alitsü bushia lendong aketba

len mang nung jajatsü mulungteter," ta UNHCR regional bureau for Asia and the Pacific lenir Hai Kyung Jun-i ashir.

2024 küm Rohingya nung nisung 657 tashi region nung aliba tzü yim nung süogo, ta UNHCR ajanga ashir.

Russia aser China tsüpoba tali akumba ajanga US aser danga anüolen linük temi defence tsütsü temulung agüja yangji senotsü tali indokba yong humanitarian organisation ya tetenlar tajung mali kumogo.

2025 küm Rohingya nung yaritsü asoshi UNHCR-i sen \$383 million nü ngdaker, saka shilem 30 dang agüja lir, ta ashir.

Khelo India Beach Games 2025 nung Nagaland ano gold ka angu



Khelo India Beach Games 2025 nung Nagaland Women's Team-i shilem agiba noksa nung angur.

Dimapur, Monupii/May 24 (TYO): Diu, UT of Dadra and Nagar Haveli and Daman and Diu nung ayongzükba Khelo India Beach Games 2025 nung Nagaland sepaktakraw women team-i Hokulbar aonung Quad Regu nung team gold nguteta iba asayamung puti otsü nung tenüng zülüokogo.

Kasa asaya tebur quad regu team event nung Delhi-i Manipur madak takok ngua gold angu.

Khelo India Beach Games 2025 nung Nagaland ya jenjang tasembuba nung tembanga gold pongu, silver asem aser bronze pongu ngua liasü. Nagaland atema gold medal pezü ya pencak silat nungi lir. Medal standings nung Manipur aser Maharashtra dang No. 1 aser No. 2 nung lir aser parnoki silver medals timba angu.

"Asaya khenyongi balaka liasü. Haryana kanga junga asaya liasü, saka tia asen

tsütsü aden aser asenoki tatem tongtet," ta Chef de Mission of Nagaland, Kethosituo Sekhose-i ashi.

"India team asoshi asen telok nungi asayar karbo shimoktsü imlar. Nagaland nungi asayar ajungai kanga junga asayaogo," ta pai ashi.

Delhi tebur team-i Manipur madak quad regu final nung 2-0 agi ako, shirnok KIBG 2025 champions ama arua liasü.

Sepak Takraw Results: Quad Regu

Men: Gold: Delhi; Silver: Manipur; Bronze: Odisha, Bihar.

Women: Gold: Nagaland; Silver: Haryana; Bronze: Uttar Pradesh, Odisha.

Trio Event

Men: Gold: Assam; Silver: Delhi; Bronze: Tamil Nadu, Manipur.

Women: Gold: Manipur; Silver: Nagaland; Bronze - Uttar Pradesh, Bihar.

Doubles Event

Men: Final: Haryana 2-0 Goa; Bronze: Telangana, Bihar.

Women: Final: Kerala 2-0 Odisha; Bronze: Andhra Pradesh, Delhi.

Team Trio

Men: Final: Delhi 2-1 Manipur; Bronze: Assam, Tamil Nadu.

Women: Final: Haryana 2-1 Manipur; Bronze: Uttar Pradesh, Nagaland.

Ibai Khelo India banner kübok Beach Games mezügbuba liasü, koba Diu, UT of Dadra and Nagar Haveli and Daman and Diu nung May 19-24, 2025 anogotem ayongzük.

Tan edition nung medal sports trok liasü - Beach Soccer, Beach Volleyball, Beach Sepak Takraw, Beach Kabaddi, Pencak Silat aser Open Water Swimming.

Diu nung medal maliba asaya ana Mallakhamb aser Tug of war densema asaya.

Hockey India-i India Masters Cup sangdongogo

New Delhi, Monupii/May 24 (Agencies): Hockey India-i Hockey India Masters Cup 2025 tenzüksü sangdongogo, koba Chennai nung June 18, 2025 nung tenzüksü aser ibai hockey asaya nung veterans tem asoshi lir.

Iba asayamung nung tebur arishi küm 40 nungi tema aser tetsür arishi küm 35 nungi tema asayatetsü aser shilem agiba team tem dak ajemdaker pool structure yanglutsü.

Hokulbarnü HI ajanga iba asayamung anogo ya social media sapang nung sangdonga liasü.

"Mezügbuba Hockey India Masters Cup 2025 ya Chennai nung tenzüksü, kong asen hockey asayar legends temi shilem agitsü. June 18 nungi June 27, 2025 tashi asayatsü. Iba asayamung ya India hockey

nung chapter tasen ka lir, koba ajanga asayar tejen tem benjongtsü, shirnoki iba asaya melenshitsü," ta ashi.

Category anaprong atema team tem tenüng ya yakta sayatsü. Yangji shilem agitsü asoshi asayar temi state member units ajanga tenüng zülüoktsü, ta HI sangdong ajanga ashi.

Taoba Indian women hockey team capiatin Asunta Lakra-ia iba asayamung asoshi pelaba lemsatepa liasü.

"Hockey India Masters Cup nung shilem agitsü ya kü atema tepelatsü osang ka lir. Hockey ajanga kü takum melenshitsü, aser asayadaki tanaben meyipa shilangtsü maongka anguba, aser külem asayar tejen temi meketbanger asayatsü ya khenyongi balaka bilemer," ta Lakra-i ashi.

Premier League Player of the Season sempet Mohamed Salah-i nguogo



Mohamed Salah

Liverpool, Monupii/May 24 (Agencies): Liverpool nungi asayar Mohamed Salah ya Premier League Player of the Season shimogo aser kasa küm par teloki English takok korang 20 ben buba angur alitsü.

Egypt nunger winger yagi tan season nung goal 28 agütsüogo aser dangari goal 18 agütsüba nunga pai yaria lir aser season tembangba asayatsü lir. Arishi küm 32 asoshi iba POTY sempet tanabuba alitsü, koba pai ka 2017-18 season nung ngua lir.

Season ka nung assists nunga Salah ya Manchester City icon Kevin De Bruyne aser Arsenal nungi asayar tejen Thierry Henry den sako lir aser Cristal Palace den tatembangba asayadang assists ana liasü.

Salah yagi küm tetenzüklen

Football Writers' Association player of the year sempeta ngua lir, kong pai vote shilem 90 jungnüa angu, aser ibai 21st century nung margin tulutiba agi iba sempet anguba alitsü. Salah ya mapang ka Chelsea nung alidang junga masayateti Premier League nungi magizüker ka ama züngshia liasü.

Salah-i it aka jakdang Liverpool den sa ano alitsü asoshi küm ana contract atsülangshia zülutepa lir.

Arne Slot mezüng campaign nung Liverpool-i Premier League takok marok ajungketogo, kechiaser teimla aliba Arsenal ya league tatemlen tamakok aiben ajuru aser Manchester City ya teimla makai akum.

Asian Belt Wrestling Alysh Championship nung tanü NWA-i medal pezü angu



New Delhi nung medal agütsüba sentong agiba sülen medal angur aser NWA ketdangsürtem külemi tangokba noksa nung angur.

Kohima, Monupii/May 24 (TYO): Delhi nung tang asaya aliba Asian Belt Wrestling Alysh Championship nung Nagaland team-i Classic & Free Style Belt wrestling nung densema medal trok - silver ka aser bronze pongu nguteta lir.

ABWAC Day 2 nung tebur aser tetsür Senior Free Style wrestling asaya liasü aser Team India asoshi tanü Senior Free Style Belt Wrestling künok

NWA team-i takok yamai angu:

* Kuvenu Puro, Silver medal under 80 Kg category (Men)

* Venuzo Dawhuo, Bronze medal under 100 Kg category (Men)

* Rokuokehie Khawakhrie, Bronze medal under 70 Kg category (Men)

* Lhupra Vero, Bronze medal under 60 Kg category (Men) Team India-isa Men's Team Championship in Alysh Classic

and Freestyle nung bronze medal ana ngua liasü, koba India Team Coaches Vekhriyi Chuzho aser Keneilel Kevin Rote nati agizük.

Yashi Classic Style event nung Vevokho Ruho of 90 Kg (Men) aser Haizuyile of 65 Kg (Women) nati Team India asoshi bronze medal angu.

Team Nagaland ya May 26, 2025 tashinung Dimapur atongtsü imlar.

BILEMDANGANG

"Takok angutsü asakba ama sempet tuluba angur."